

à vous tant chierement comme plus povons. Et vous pleise savoir que nous envoyons par devers Monseigneur le Connestable tel notre porteur de ces présentes, par lequel lui envoyons unes lettres desquelles vous envoyons la copie cy dedans enclose. Et pour ce que, la votre grace, avez toujours euz les affaires communs de ceste ville de Lion pour recommandez, nous vous prions trèschierement qu'il vous pleise nous et la dite ville de Lion avoir pour recommandez envers mondit seigneur le Connestable et aidier à expédier le dit porteur le mieulx et le plus brief que vous pourrés, ainsi que, la mercy Notre Seigneur, il est bien en votre puissance et que nous y avons pleine fiance. Et avecque ce vous pleise nous commander vos bons pleisirs, car en bonne foy nous les accomplirons à notre pouvoir et tres bon cuer.

Treschier et honnoré Seigneur, nous prions Notre Seigneur, qui vous doint bonne vie et longue. Escript à Lion, le xxvj<sup>e</sup> jour de février (1427, n. s.).

Les tous vôtres, les Conseillers et habitans de la ville de Lion.

#### DU CONNETABLE.

A noz treschiers et bons amis les Conseillers, Bourgeois et habitans de la ville de Lyon.

Treschiers et bons amis, nous avons receu vos lettres que par Jehan Violet, porteur de cestés, envoyées nous avez et veu le contenu d'icelles. Et quant à ce que dites au regard des lettres que vous avons escriptes, touchant ce qui nous est deu de reste de l'assignacion que avons dès pieça sur la ville, que vous ne cuidez pas que quant nous les signasmes nous fussions advertis du contenu en icelles, et